

## FERTAS E ISPERAS

“ Sos contos, o manneddu, naramilos  
de cuddos logos innidos fadados:  
in su sentidu tèssimi sos filos  
de montes, padros, rios e de bados”.

“Sos ojos si m’ammantant de tristura  
a da chi torro in segus a cuddae,  
sos sartos incantados d’ermosura  
chi sas intragnas faghent a piaie.

De àrvores su monte carrarzadu,  
daiat linna e sida pro s’ierru.  
Suerzos, chercos, èlighes su fadu  
creschiat cun lidone e aliderru.

Su pàsculu rupiat bundarosu,  
bastante a feras,amas e masones:  
teniant sos pastores onzi gosu  
pesende a mizas ‘ijos e anzones.

In custu paris, subra a sos benujos,  
creschiat a ispantu su laore  
e fint in sas arzolas sos mannujos  
s’istrina pro un’annu de suore.

Med’abbas nos daiat Babbu Mannu,  
a bunda pro pasturas e pro venas.  
Sos rios curre curre tottu s’annu  
faghiant pojos mannos e pienas”.

Nde restat su pitzinnu a bucca abberta  
e pedit cun ispantu a su manneddu:  
“ E chi est chi l’at fatta custa ferta?  
Sa zente at furriadu su cherveddu?”

## FERITE E SPERANZE

*“ Raccontami, o nonno, le vicende  
di quei luoghi integri e fatati  
e tessi nell’intimo i ricordi  
di monti, piani, fiumi e di guadi”.*

*“ Gli occhi si velano di tristezza  
nel ritornare indietro su quei posti,  
i pascoli incantati di splendore  
che aprono nel cuore tante piaghe.*

*Di alberi coperte le montagne,  
davano legna e foraggio per l’inverno.  
Sughere, querce, lecci il fato  
faceva crescere con corbezzolo e fillirea.*

*I pascoli maturavano abbondanti,  
sufficienti a fiere, greggi e mandrie:  
i pastori erano molto felici  
allevando agnelli e vitelli a migliaia.*

*In questa piana, oltre le ginocchia,  
abbondava il grano a meraviglia  
e nelle aie i covoni rappresentavano  
la ricompensa per un anno di sudore.*

*Il Padreterno ci dava piogge abbondanti,  
più che sufficienti per pascoli e sorgenti.  
I fiumi scorrevano tutto l’anno  
formando specchi d’acqua e grandi piene”.*

*Il bambino rimane a bocca aperta  
e chiede attonito al nonno:  
“ Ma chi è che ha fatto questo scempio?  
La gente era forse impazzita?”*

“ Ted’esser como trinta o barant’annos  
inturzos accudeint furisteris:  
cun fàulas e lanas e ingannos  
promittint tempus menzus de su deris.

Sa zente ant conchinadu e sos potentes  
ca, nachi, ch’isperdiant sos bandidos:  
su mundu s’ant tzaccadu sutta ‘e dentes  
e mancu in cara nemos los at bidos.

In cussas mandras mannas de tzimentu  
pastores ant serradu cun massajos:  
sa zente est accudida a chentu a chentu  
lassende sas fainas de sos jajos.

E como, ja l’annottas fintzas tue,  
cadone ch’at restadu e ardu reu:  
sos meres sunt andados fue fue  
lassende zente meda chena impreu.

Pro un’ammentu ‘e dura ‘e cuss’improddu  
ebbia abbarrant custas tzimineras:  
brujadu ant de sos sardos onzi soddu  
umpare a tantos bisos e isperas”.

Bidende cussu arrore ‘e disaccattu,  
su pitzinneddu narat:” Sa ruina!  
Non benit bene tottu su ch’ant fattu  
mazores cun cherveddu ‘e pisterchina.

Ma juro chi pro cantu appo a campare  
appo a muntenner biu su disizu  
de poder custu dannu azerettare  
boghende su connottu torra a pizu”.

*“ Sarà circa trenta o quaranta anni fa,  
arrivarono degli avvoltoi da fuori:  
con bugie, chiacchiere ed inganni  
promisero tempi migliori del passato.*

*Hanno turlupinato gente e governanti  
promettendo di debellare il banditismo:  
hanno divorato tutto ciò che c’era  
e nessuno li ha mai neppure visti in faccia.*

*In quei grandi recinti di cemento  
hanno rinchiuso pastori e contadini:  
sono arrivate centinaia di persone  
abbandonando le antiche attività.*

*Ed ora, puoi vedere tu stesso,  
sono rimaste erbacce e cardi asinini:  
i padroni, poco alla volta, sono fuggiti  
lasciando molta gente senza lavoro.*

*A ricordo perenne di quel pasticcio  
rimangono solo queste ciminiere:  
hanno bruciato tutti i soldi dei sardi  
assieme a tanti sogni e speranze”.*

*Vedendo quell’infame risultato  
Il bambino dice:” Che disastro!  
Non è possibile ciò che hanno fatto  
potenti con cervello da ragazzacci.*

*Ma giuro che finché vivrò  
conserverò vivo il desiderio  
di rimettere le cose a posto  
riportandole a come erano un tempo”.*

